

Headlines

- 18मां प्रवासी भारती दिवस सम्मेलन शुरु। विदेश मंत्री डाक्टर एस. जयशंकर होरें भारत दे विकास च नौजवानें दी भूमिका दी सराहना कीती ऐ।
- लेफ्टिनेंट गवर्नर मनोज सिन्हा होरें आखेआ ऐ जे अपनी तकदीर आपूं लिखने ते जम्मू-कश्मीर दे भविक्ख गी नमां आकार देने दी जिम्मेदारी नौजवानें उप्पर ऐ।
- खुराकए सिविल सप्लाई ते उपभोक्ता मामलें सरबंधी मंत्री सतीश शर्मा होरें केन्द्री मंत्री प्रहलाद जोशी हुंदेश्रै मलाटी करियै जम्मू-कश्मीर च अक्षय उर्जा दे खेत्तर गी तगड़ा बनाने दा आग्रैहू कीता।
- रेलवे सुरक्षा कमिशनर होरें उधमपुर.श्रीनगर.बरामूला रेल लिंक परियोजना दी कटरा.बनिहाल सैक्शन पर तेज रफ्तार खीरी आजमाईशां शुरु कीतीआं।
- जम्मू-कश्मीर विधानसभा च नमें चुने गेदे विधायकें लेई सिखलाई कार्यक्रम कल्लै थमां शुरु होग। सदन दे कम्मकाज गी कागद.रैहत बनाने लेई इक चेचा सत्र राश्ट्री ई.विधान परियोजना पर बी लोआया जाह्ग।

<><><><><><>

Pravasi Bhartiya Divas

18मां प्रवासी भारतीय दिवस सम्मेलन अज्ज बड्डुलै ओडिशा दे भुवनेश्वर च शुरू होआ। एहदे च 75 मुलखें थमां आए दे करीब 6 ज्हार प्रवासी भारतीय हिस्सा लै करदे ना। युवा प्रवासी भारतीय दिवस दे उद्घाटन समारोह दौरान बोलदे होई विदेश मंत्री डॉ. एस जयशंकर होरें आखेआ जे इक्क आधुनिक, समग्र ते प्रगतिशील समाज दे निर्माण च मते चिरें थमां पेश आवै करदी चुनौतिएं दा हल कडुने दी दिशा च भारत तेजिया कन्नै अगड़ा बधा करदा ऐ। जयशंकर होरें नौजवानें आसेआ आलमी सतह पर कीती गेदी महत्वपूर्ण पैहलकदमियें जियां आर्टिफिशल इंटेलिजेंस, स्टार्ट अप, अंतरिक्ष दी खोज ते ड्रोन वगैरा दे विकास पर लौऽ पाई। उनें जोर देइयै आखेआ जे भारत गी विकसित राश्ट्र बनाने दी जिम्मेदारी च नौजवानें गी महत्वपूर्ण भूमिका निभानी होग ते भविक्ख दिएं पीढिं गी समाज दी तरक्की गै अगगे आइयै अपने हल्यें आकार देना होग। प्रधानमंत्री नरेंद्र मोदी होर कल औपचारिक तौर पर इस कार्यक्रम दा उद्घाटन करंगना। राष्ट्रपति द्रौपदी मुर्मु होर शुक्रवारें समापन सत्र दी अध्यक्षता करडना। ओहू बक्ख-बक्ख खेत्तरें च प्रवासी भारतीयें दी उपलब्धियें आस्तै उनेंगी प्रवासी भारती सम्मान बी भेंट करडना।

<><><><><><>

Gadkari

केन्द्रीय शिडक ते यातायात ते राष्ट्रीय जनैली शिडकें सरबंधी मंत्री नितिन गडकरी होरें नमी कैशलैस ट्रिटमेंट स्कीम दी शुरुआत कीती ऐ। एदे राए हादसे करी प्रभावित लोकें गी फौरी तौर पर मदद दिती जाग। इस स्कीम तैहत पीडित गी डेढ लक्ख रपे तगर दी राशी हादसे दे 24 घंटे दे अन्दर अन्दर दिती जाग ते 2 लक्ख रपे दी राशी मारिए नस्सी जाने आले मामले च पीडित गी उपलब्ध करोआई जाग। इस बारै गल्ल करदे होई केन्द्री मंत्री नितिन गडकरी होरें आखेआ। प्रैस कान्फ्रेंस गी सम्बोधित करदे होई मंत्री होरें आक्खेआ जे मुलख च अच्छे ड्राइवरें दी कमी ऐ ते सरकार एदे लेई ड्राइविंग सिक्खने आहले होर मते केंद्र खोलने आस्तै बचनबद् ऐ कीजे शिडक सुरक्षा स्हाडे लेई सब्बनें शा मती जरूरी ऐ।

<><><><><><>

LG JK Contingent

लेफ्टिनेंट गवर्नर मनोज सिन्हा होरें नमीं दिल्ली च आयोजित होने आहले राश्ट्रीय युवा उत्सव लेई जम्मू-कश्मीर दे दस्ते गी अज्ज झंडी दस्सियै रवाना करवाया। राश्ट्रीय युवा उत्सव आहला एहू कार्यक्रम नौजवानें गी बक्ख-बक्ख श्रेणियें जियां लोक-नाच, शायरी, लेख लिखने, चित्रकारी ते संगीत दे खेत्तरें च अपने हुनर दा प्रदर्शन करने लेई इक बड़ा बढिया मंच उपलब्ध करोआंदा ऐ। एल.जी सिन्हा होरें नौजवानें अंदर नेतृत्व कौशल विकसित करने ते नौजवानें गी उंदी रचनात्मकता ते सांस्कृतिक बन-सबन्नता दा प्रदर्शन करने दा मौका उपलब्ध करवाने लेई इस चाल्ली दे कार्यक्रमें दे महत्वै उप्पर जोर दित्ता। उनें प्रतिभागिं गी आग्रह कीता जे ओहू पूरे म'नै कन्नै जम्मू-कश्मीर दी नुमायंदगी करन ते इस मंच दे राहें अपने हुनर दा लोहा मनवाना। एल.जी होरें आखेआ जे अपनी तकदीर आपूं लिखने ते जम्मू-कश्मीर दे भविक्ख गी इक्क नमां आकार देने दी जिम्मेदारी नौजवानें उप्पर ऐ। उनें आखेआ जे एहू उत्सव मुलख भरै थमां नौजवानें गी किट्टै इक्कै मंच पर आहनेने दा मौका प्रदान करोग। उनें आखेआ।

<><><><><><>

Satish-Prahlad Joshi

जम्मू-कश्मीर दे खाद्य, नागरिक आपूर्ति ते उपभोक्ता मामलें दे राज्यमंत्री सतीश शर्मा होरें अज्ज खाद्य ते उपभोक्ता मामलें दे केंद्रीय मंत्री प्रहलाद जोशी हुंदे कन्नै मिले ते उन्दे कन्नै जम्मू-कश्मीर च अक्षय उर्जा गी मजबूत बनाने लेई बक्ख-बक्ख विकास पैहलकदमिणं बारै गल्लबात कीती। इस बैठक च सौर उर्जा गी पानी कन्नै बिजली पैदा करने आहले प्रोजेक्टें गी बढावा देने, दूर-दराज दे इलाकें तगर बिजली पजाने बारे गल्लबात होई। उनें आखेआ जे स्हाढा मकसद जम्मू-कश्मीर च अक्षय उर्जा बधाने आह्लिएं इनें विकास पैहलकदमिणं राहें इस केंद्र शासित प्रदेश गी आत्मनिर्भर बनाना ऐ।

<><><><><><>

TB-Campaign Samba

तपेदिक यानि टी.बी दे खात्मे दी दिशा च पुट्टी गेदी इक्क बड्डी गैंऽ दे तैहत रम्भे गेदे सौ दिनें दे टी.बी उन्मूलन अभियान दे तैहत साम्बा जिले च टी.बी दे 50 मरीजें दी निक्षय पोषण किट्टां बंढियां गेइयां। साम्बा दे डिप्टी कमिशनर राजेश शर्मा होरें इस कार्यक्रम दी प्रधानता कीती ते मुख मेडिकल अधिकारी डॉ. विधि भटियाल हुंदी निगरानी तैहत एहदा आयोजन कीता गेआ। इस कार्यक्रम दौरान टी.बी शा ग्रस्त लोकें गी उचित ढंग्गै कन्नै इलाज करवाने ते सत्तदार खुराक लैने दे महत्व बारै जागरूक कीता गेआ तां जे ओहू तौले शा तौले टी.बी हराई सकन। इस अभियान गी दिसंबर 2024 च रम्भेआ गेआ हा ते एहदा मकसद इसै बारै भारत गी टी.बी मुक्त बनाना ऐ। स्हाढे जिला संवाददाता कन्नै गल्ल करदे होई साम्बा दिणं मुख मेडिकल अधिकारी डॉ. विधि भटियाल होरें आखेआ।

<><><><><><>

CRS-Speed Trial

रेलवे सुरक्षा कमिशनर दिनेश चंद देशवाल हुंदी अगवाई चअज्ज उधमपुर-श्रीनगर-बारामूला रेल लिंक दे कटडा-बनिहाल सेक्शन दा खीरी स्पीड ट्रायल होआ। एहू खीरी स्पीड ट्रायल मुख् दे सब्बनें शा उच्चे अंजी खड्डू रेलवे पुल उप्पर कीता गेआ। इस बारै गल्ल करदे होई रेलवे सुरक्षा कमिशनर दिनेश चंद देशवाल होरें आखेआ। तोआई रेलवे सुरक्षा दे कमिशनर होरें कल कटडा-रियासी सेक्शन ट्रैक दे ढांचे दा उत्थे बनी दियें सुरंगें, स्टेशनें ते पुलें दा जायजा लैता हा ते इस बारै संदोख बी जाहिर कीता हा। स्हाढे जिला संवाददाता हुंदी रिपोर्ट मूजब इस ट्रायल दे बाद कमिशनर होर इक रिपोर्ट पेश करडन जेडी कश्मीर तोड़ी रेलवे सेवा पजाने च मार्गदर्शन करोग ते अगगे दी कार्यवाही लेई बी मदाद करोग।

<><><><><><>

JK MLA's Training Prog.

नमें चुनोए दे विधायकें लेई त्रै रोजा सिखलाई कार्यक्रम 9 थ्वां 11 जनवरी तगर जम्मू च असैम्बली दे केंद्री हाल च लगगोग। एहदा सरिस्ता लोकसभा सचिवालय दे शोध ते सिखलाई इदारे 'प्राइड' आसेआ कीता जा'रदा ऐ। एहदा मकसद विधायकें गी सरबंधत जानकारीयां देना ते उनेंगी सिखलाई उपलब्ध करोआना ऐ तां जे आम लोकें दे मसलें गी हल कीता जाई सकै। इंदे च केंद्र शासित प्रदेश की 90 सदस्यें आहली विधानसभा च कुल 88 विधायकें चा 51 पहली बार नमें चुनोए दे विधायक न। सिखलाई आहले इस कार्यक्रम दौरान इनें विधायकें गी विधायी प्रक्रियाएं, बजट मतल्लक कम्म-काज ते कार्यकारी जवाबदेही ज्नेह विषें बारै जानकारी दिती जाग। एहदे अलावा इस कार्यक्रम दौरान इक्क इजलास चेचे तौरा पर राश्ट्रीय ई-विधान प्रोजेक्ट लेई रक्खेआ गेदा ऐ जेदा मकसद सदन दे कम्मकाज गी कागदरैहत बनाना ऐ। इस सिखलाई कार्यक्रम च लोकसभा ते राज्यसभा थमां माहिरें ते वरिष्ठ सांसदें दे हिस्सा लैने दी मेद ऐ।

<><><><><><>

DC-Doda Beautification

डोडा च ढांचागत विकास दी दिशा च इक्क बड्डी गैंह पुट्टे होई जिला प्रशासन नै डिप्टी कमिशनर हरविंद्र सिंह हुंदी अगवाई च जिले दा छलैपा बदाने आस्तै इक्क बड्ठा विकास प्रोजेक्ट उम्भेआ ऐ। 5 करोड़ रुपें दी रास-पूजी आहली इस पैहलकदमी तैहत इक्क बड्ठे सौआगती गेट ते 700 मीटर दे तफरी ते मनोरंजन पार्क दा निर्माण शामिल ऐ। एहू सौआगती गेट शैहरा दी पंछान दा इक्क ऐतिहासिक प्रतीक बनोग जिस्सलै के एहू पार्क मकामी बसनीकें ते सैलानिणं गी आकर्षित करोग। इस प्रोजेक्ट दा मकसद शैहरी सुधार आहली इक्क चिरकी मंग गी पूरा करना, सैलसफा समर्थ च बाढा करना ते शैहरा दे छलैपे गी होर बदाना ऐ। स्हाढे जिला संवाददाता कन्नै इस बारै गल्ल करदे होई डोडा दे डिप्टी कमिशनर हरविंद्र सिंह होरें आखेआ।

<><><><><><>

Weather-Highway

मौसम विभाग नै इस म्हीने दी 10 तरीक तोड़ी खुशक मौसम दे कन्नो-कन्नो बदलें दे असार दस्से ना। मौसम विभाग दे मताबक जम्मू-कश्मीर दे मताबक जम्मू-कश्मीर दे उच्चे थाहरें उप्पर 11 जनवरी तोड़ी पौने दे ते जम्ू दे मैदानी इलाकें च हल्की बरखा होने दे असार दस्से ना। तोआई, जम्मू-श्रीनगर जरनैली शिड़क उप्पर गड्डियें दी आओजाई दपक्खी चला'रदी ऐ ते मूगल रोड, जेड़ी पुंछ ते राजौरी गी कश्मीर घाटी कन्नै जोड़दी ऐ, ओहू भारी बर्फ पौने करी बंद ऐ। जरनैली शिड़क उप्पर आने-जाने आहलें गी नियमें मताबक चलने दी सलाह दित्ती जा'रदी ऐ।

<><><><><><>

Judo Rakesh Singh

जम्मू दे दिव्यांग खडारी राकेश सिंह होरें मलेशिया दे कुआलालम्पुर च होई दी दसमीं एशिया पैसिफिक डैफ गेम्स 2024 च जूडो दी श्रेणी च कैंड दा तगमा जित्तियै पूरे खित्ते दा नांऽ रोशन कीता ऐ। राकेश सिंह हुंदे कोच सूरजभान सिंह होरें उन्दे बेजोड़ समर्पण दी सराहना करदे होई उन्दी अखौखी सिखलाई जात्तरा पर बी लौऽ पाई। उनें आखेआ जे राकेश हुंदी इस उपलब्धि नै ना छड़ा खित्ते दा मान बदाया ऐ, सगुआं एहू होरनें दिव्यांग लोके गी बी चुनौतियें दे बावजूद अगें बदने लेई प्रेरित करदी रौहगा। स्हाडे जिला संवाददाता कन्नै गल्ल करदे होई राकेश हुंदे कोच सूरजभान सिंह होरें अखेआ।

<><><><><><>